

Powšitkowne WOZJEWJENJA

njedźelu, 27. septembra 2020

Nyšpor z požohnowanjom konjacych zapřahow

Towarstwo Cyrila a Metoda přeprašuje wšitkich wěriwych tež lětsa na wosebity nyšpor domchowanki z požohnowanjom konjacych zapřahow. Tutón budže tutu njedźelu, 27. septembra, w 14.00 hodź. w Chróšćicach na łuce při Hatkach. Nyšpor wobrubja wosadni dujerjo. Zarjadowar skedźbnja na to, zo maja so powšitkowne hygieniske postajenja wobkedźbować.

Wustajeńca wo česćowanju swjateho Bosćana

W Chróšćanskim Hórnikowym domje je wustajeńca wo česćowanju swjateho Bosćana w Chróšćanskej wosadze hač do wutory, 29. septembra, přistupna. Tutu njedźelu, 27. septembra, maja zajimcy po nyšporje hač do 17 hodź. a wutoru wot 17 do 19 hodź. přiležnosť, sej ju wobhladać. Wustajeńca nasta w zamołwitosći Towarstwa Cyrila a Metoda z.t. zhromadnje z Chróšćanskej wosadu a tamnišim Bratstwom swjateho Bosćana składnostnje 600. rónčicy załoženja tohole bratstwa.

Zaso dwoje kemše w Róžeńće

W Róžeńčanskej hnadownej cyrkwi su wot tuteje njedźele, 27. septembra, zaso dwoje kemše, w 9 hodź. w serbskej a w 10.30 hodź. w němskej rěči. Nyšpor je tam w 14 hodź.

Marije-Marcíny dom nawjedować

Klášter Marijina hwězda pyta za swój Marije-Marcíny dom za zbrašenych nowu wosobu za jeho nawjedowanje. Městno ma so 1. januara 2021 wobsadzić. Wobšěrne wupisanje z konkretnym profilom dželoweho městna je na internetnej stronje www.marienstern.de. wozjewjene. Zajimcy měli swoje pisomne podložki hač do 15. oktobra w kláštrje zapodać.

Dalši serbski žarowanski kruh

Žarowanskaj přewodzerjej Regina Krawcowa ze Smječkec a Tomaš Pěčka ze Sernjan poskićataj znova serbski žarowanski kruh. Prěnje zetkanje budže štwórtk, 5. nowembra, w 17.00 hodź. w Chróšćanskej putniskej hospodze. Zajimcy měli so pola hospicneje služby w Kamjencu pod telefonowym čisłom (0 35 78) 37 43 12 abo pola Reginy Krawcoweje pod čisłom (01 74) 7 01 94 87 přizjewić.

Ze štyrjomi rukami a štyrjomi nohami

Wosebity koncert z piščelowej hudźbu za štyri ruki a štyri nohi zaklinči njedźelu, 27. septembra, w 17.00 hodź. w Šerachowskej farskej cyrkwi Marije donjebjeswzaća. Spřecelenaj cyrkwinskaj hudźbnikaj Feliks Brojer z Budyšina a Thorsten Schwarte z Münstera prezentujetaj w dueće hudźbny přerězk wot dwójnochóroweje italskeje hudźby renesansy, přez romantiske kompozicije k načasnym twórbam. K tomu zanjesetaj tež swójske kompozicije. Koronowych wobmjezowanjow dla maja so zajimcy za tutón koncert w farskim běrowje přizjewić, telefonowe čisło (0 35 92) 54 43 46.

Duchowna hudźba

W Budyskej tachantskej cyrkwi wotměje so njedźelu, 4. oktobra, we 18.00 hodź., duchowny koncert chóroweje hudźby z Budyskim Katolskim tachantskim chórom. Pod cyłkowym nawodom cyrkwinskohudźbneho direktora Friedemanna Böhmy zaklinčitej „Magnificat“ Jana Dismasa Zelenki (1679-1745) a „Missa in Es“ Christiana Gottloba Augusta Bergta (1772-1837) ze solistami a orchestrom Serbskeho ludoweho ansambla. Wšitcy su wutrobnje přeprošeni. Zastup na koncert pak budže koronowych předpisow dla jenož z podaćom mjena a telefonoweho čisła móžny.